

«Հաստատում եմ»
«Երևան» բժշկագիտական կենտրոն» ՓԲԸ
տնօրեն՝ Հովիկ Բալյան

ԱՌԱՋԱՏԱՐ ԿԱԶՄԱԿԵՐՊՈՒԹՅԱՆ ԳՐԱԽՈՒՍԱԿԱՆ

ԺԴ.00.12 «Ստոմատոլոգիա» մասնագիտությամբ բժշկական գիտությունների
թեկնածուի գիտական աստիճանի հայցման համար ներկայացված
Աննա Աշոտի Ավետիսյանի՝ «Ատամների դիսկոլորիտների բուժման
արդյունքների կանխատեսումը և բարդությունների կանխարգելումը՝
պայմանավորված բուժման մեթոդների ընտրությամբ» թեմայով
ատենախոսության վերաբերյալ

Աշխատանքի արդիականությունը

Դիսկոլորիտները ատամների բնական գույնի խախտումներով ուղեկցվող
կառուցվածքաֆունկցիոնալ և էսթետիկ խանգարումներ են, որոնք պոլիէթիոլոգիկ են
և ունեն լայն տարածում: Ժամանակակից ստոմատոլոգիայում դիսկոլորիտների
բուժման մեթոդների լայն ցանկը հնարավորություն է տալիս ընտրություն կատարել
թերապևտիկ և ռեկոնստրուկտիվ մեթոդների միջև: Պացիենտի կյանքի՝
ստոմատոլոգիական առողջությամբ պայմանավորված որակի նվազումը, շփման
բարդույթների ձևավորումը հանգեցրել են դիսկոլորիտների բուժման, ինչպես նաև
էսթետիկ նկատառումներով վերոհիշյալ մեթոդների կիրառման մեծ պահանջարկի:
Խնդրի արդիականության և հասարակության ընդգրկուն շրջանակներում
միջամտությունների մեծ պահանջարկի հիմնապատկերին՝ դիսկոլորիտների
վերացման համար առկա կոնսերվատիվ (սպիտակեցում) և ռեկոնստրուկտիվ
(կարծր հյուսվածքների ռեզեկցիա՝ հետագա կոմպոզիտային վերականգնումով
և/կամ վինիրների կամ լյումինիրների պատրաստումով և այլն) մեթոդների
կիրառման անհրաժեշտության հստակ տարանջատման բացակայությունը լուրջ
մարտահրավեր է ներկայացնում՝ բուժական միջոցառումների իրականացման
անվտանգության և հնարավոր բարդությունների կանխարգելման տեսանկյունից:
Ատենախոսությունը նվիրված է այդպիսի մարտահրավերների կասեցմանը,
արդիական է և միտված է խնդրի լուծման արդյունավետության բարձրացմանը՝
հնարավոր բարդությունների կանխմամբ:

Ռեսուլտավրացվող ատամների՝ առանց այդ էլ սահմանափակված
բիոմեխանիկական պոտենցիալի՝ նվազագույն ինվազիվ տեխնոլոգիաների միջոցով
պահպանման անհրաժեշտությունը, դիսկոլորիտներով պացիենտների

ստոմատոլոգիական օգնության մակարդակի բարձրացման կարևորությունը, ինչպես նաև բուժման տարբեր մեթոդների արդյունավետության և անվտանգության մասին մասնագետների միասնական կարծիքի անհստակությունը, ատամների ռեզիստենտականության բարձրացման անհրաժեշտության վերաբերյալ հարցերի ամբողջական ուսումնասիրությունների, բուժման բարդությունների կանխարգելման ամբողջական սխեմաների բացակայությունը շեշտում են խնդրի արդիականությունը և լուծման ռացիոնալ տարբերակների որոնման անհրաժեշտությունը:

Աշխատանքի գիտական նորույթն այն է, որ առաջին անգամ իրականացվել է՝

- տարբեր ազգերի ուսանողների ատամների գունային գամմայի համեմատական վերլուծություն,
- ստոմատոլոգիական ստատուսի և սպիտակեցումից հետո առաջացող բարդությունների միջև կորելացիոն կապի վերլուծություն,
- ստոմատոլոգիական ստատուսից կախված՝ պացիենտի ատամների սպիտակեցման անհատական օպտիմալ աստիճանի հաշվարկման բանաձևի դուրսբերում(մշակում, սահմանում):

Աշխատանքի գիտագործնական նշանակությունը

Աշխատանքն ունի կարևոր գիտագործնական նշանակություն և արժեք: Ատամների կարծր հյուսվածքների հանքայնացման աստիճանը բնութագրող միկրոտարածությունների ծավալի՝ սպիտակեցումից առաջ և հետո սահմանված ժամանակահատվածներում որոշելու և արդյունքների վերլուծության միջոցով դուրս է բերվել աշխատանքի կարևոր գիտագործնական նորույթներից մեկը, այն է՝ ստոմատոլոգիական ստատուսից կախված՝ բուժառուների ատամների սպիտակեցման անհատական օպտիմալ աստիճանի հաշվարկման բանաձևի սահմանում: Վերջինը հնարավորություն է տալիս, ոչ միայն ճիշտ պլանավորել բուժման ծավալը՝ թերապևտիկ և օրթոպեդիկ մոտեցումների դեպքում, այլև սահմանում է ցուցումների ու հակացուցումների միջակայքեր՝ կանխելով վերահաս բարդությունները և ատամների կարծր հյուսվածքների անդառնալի փոփոխությունները:

Հեղինակը հիմնավորում է նաև պացիենտի ստոմատոլոգիական ստատուսի հաշվառմամբ՝ սպիտակեցման խնդրի նկատմամբ տարբերակված բուժական մոտեցում ցուցաբերելու անհրաժեշտությունը՝ կարիեսի նկատմամբ էմալի բարձր և միջին դիմադրողականություն ունեցող անձանց մասնագիտական և տնային սպիտակեցում առաջարկելիս՝ սպիտակեցման համակարգի օպտիմալ տեսակի

ալգորիթմի կիրառմամբ: Հեղինակն առաջարկում է նաև հնարավոր բարդությունների կանխարգելման և ռեաբիլիտացիայի ալգորիթմ: Ներկայացված գործնական առաջարկները ունեն գիտագործնական մեծ նշանակություն, հիմնված են հետազոտության արդյունքների վերլուծությամբ ստացված տվյալների վրա և լիովին իրագործելի են առաջատար բժշկների գործունեության իրականացման համար: Դրանք մեծապես կօգնեն բժշկ-ստոմատոլոգներին, թե՛ թերապևտիկ ստոմատոլոգիայի և թե՛ օրթոպեդիկ ստոմատոլոգիայի ոլորտներում՝ իրականացնելու բուժման ճիշտ պլանավորում, ինչը հնարավորություն կտա խուսափել անդառնալի բարդություններից և ապահովել բուժման կայուն արդյունք:

Ատենախոսության և սեղմագրի բովանդակության գնահատում

Ներկայացված ատենախոսական աշխատանքն իր կառուցվածքով լիովին համապատասխանում է գործող չափանիշներին և պահանջներին, ինչպես ծավալի (147 էջ), այնպես էլ կառուցվածքի տեսանկյունից: Աշխատանքում ընդգրկված հետազոտվողների թիվը եղել է 952: Հետազոտության ընթացքում կիրառված մեթոդաբանությունը հիմնված է ժամանակակից մոտեցումների վրա և ապահովում է ստացված արդյունքների օբյեկտիվությունը: Այդ արդյունքները մշակվել են համապատասխան վիճակագրական մեթոդներով, ինչը բարձրացնում է վերլուծության արժանահավատությունը: Աշխատանքում ընդգրկված կլինիկական տվյալները, ինչպես նաև համապատասխան աղյուսակները, գրաֆիկները և կլինիկական նկարները նպաստում են հետազոտության լիարժեք ներկայացմանը: Ատենախոսության հիմնական գիտական դրույթները և եզրակացությունները հստակ հիմնավորված են, տրամաբանական հաջորդականությամբ բխում են կատարված հետազոտությունների արդյունքներից:

Սեղմագիրն ամբողջությամբ համապատասխանում է ատենախոսության բովանդակությանը: Ատենախոսական աշխատանքի հիմնական դրույթները ներկայացված են սեղմագրում:

Ատենախոսական աշխատանքի շրջանակներում տպագրվել է 10 գիտական հոդված՝ ԲՈԿ-ի կողմից առաջադրված՝ համապատասխան հրատարակումների համար առաջարկվող ցանկում ընդգրկված տեղական և միջազգային ամսագրերում: Հրատարակումներից 2-ը ազդեցության գործակցով ամսագրերում են և ունեն համապատասխանաբար 110 և 175 ցիտում՝ 3-4 տարիների ընթացում:

ԵԶՐԱԿԱՑՈՒԹՅՈՒՆ

Աննա Աշոտի Ավետիսյանի «Ատամների դիսկոլորիտների բուժման արդյունքների կանխատեսումը և բարդությունների կանխարգելումը՝ պայմանավորված բուժման մեթոդների ընտրությամբ» թեմայով բժշկական գիտությունների թեկնածուի գիտական աստիճանի հայցման ատենախոսությունը ինքնուրույն, ավարտուն, արդիական թեմայով իրականացված գիտական աշխատանք է, որում կատարված գիտական և կլինիական հետազոտությունների տվյալների համեմատական վերլուծությունները և ստացված արդյունքները կիրառելի են գործնական ստոմատոլոգիայում: Աշխատանքը հիմնված է մեթոդաբանական ճշգրիտ ուրվագծված գործադրելի նպատակի, հետազոտման ժամանակակից եղանակների և վիճակագրորեն հավաստի տվյալների վրա: Ատենախոսությունը լիովին համապատասխանում է ՀՀ ԲԿԳԿ-ի պահանջներին, իսկ ինքը՝ հեղինակ Աննա Աշոտի Ավետիսյանը, արժանի է հայցվող կոչմանը:

Աշխատանքը քննարկվել և հավանության է արժանացել «Երևան» բժշկագիտական կենտրոն» ՓԲԸ գիտական խորհրդի կողմից 2026թ. փետրվարի 2-ին : Քննարկմանը մասնակցել են բ.գ.դ. պրոֆեսոր Յու. Մ. Պողոսյան, բ.գ.դ. պրոֆեսոր Ա. Լ. Չիլինգարյան, բ.գ.դ. պրոֆեսոր Լ.Գ. Թունյան , բ.գ.թ. Կ.Ա. Հակոբյան, Ա. Է. Կասյան , Բ.Ա. Քյուրջյան և գիտական խորհրդի այլ անդամներ :

«Երևան» բժշկագիտական կենտրոն» ՓԲԸ

տնօրեն՝

Հովիկ Բալյան

«Երևան» բժշկագիտական կենտրոն» ՓԲԸ

գիտական քարտուղար՝

Լ.Գ. Թունյան

